

Riséye

Ci n'èst nin tot d'awè dèl geûye, gn-a dèès còps qu'i vaut mia awè dèès bounès djambes.

On fonctionnaire dèl répression dèl baltrîje si présinte dins one cinse rèsculéye di tot èt-z-atauchî l' cinsî :

- Monsieur, il est de mon devoir d'inspecter votre ferme pour culture illégale de cannabis.

- Ô, ô, bin c'èst vos qui m' l'aprint, Mossieû l' controleûr. Mins si vos-èstoz payî po choûter dèès parèyès bièstrîyes, fioz veste ovradge sins vos r'tourner après mi.

Mi, dji m' va fé l' mèn' pace qu'i-gn-a nuk què l' frè à m' place.

Dji vos consîye tot l' minme di n' nin aler dins l' tchamp véla pad'vant pace qui...

Li fonctionnaire nè lî a nin lèyî l' timps d'achèver s' frâse. I monte su sès grands tch'vaus, zoupler come on coq su l'ansènî tot mostrant s' cârte avou l' catchèt dèl Réjion walone :

- Monsieur, j'ai l'autorité du gouvernement. Vous voyez cette carte, elle me permet d'aller où je veux, et cela sans justification. Suis-je assez clair ?

I faut ôte tchôse qui ça po sbarer l' cinsî. I osse si tièsse èt toûrner l' dos au fonctionnaire tot d'djant :

- Alez ou ç' qui vos v'loz, vos-èstoz bin payî po prinde dèès risses.

One miète après, li cinsî qui fieut l' sogne ètind bwêrler do costé do tchamp pad'vant.

I broke su l' soû d' l'uch do stauve èt veûy li fonctionnaire què l' trosse avou l' twa à s' cu què l'aleut bin rade rawè.

– Vosse cârte, di-st-i l' cinsî ! Mostrez lî vosse cârte !

André Ferard (d'après un texte d'Ernest Benoît).